

Uunga siunnersuut: Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata allanngortinneqarneranik Inatsisartut inatsisaat

(Aningaasaqarnermut Nunamullu Namminermt Naalakkersuisoq)

Saqqummiussissut

(Aningaasaqarnermut Nunamullu Namminermt Naalakkersuisoq)

Siullermeerinnineq

Naalakkersuisut sinnerlugit Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata allanngortinneqarneranik Inatsisartut inatsisissaattut siunnersuut matumuuna saqqummiutissavara.

Inatsimmik allannguinnissap siunertaraa Kalaallit Nunaata Aatsitassarsiornermi Aningaasaateqarfiata ingerlanneqarneranut, allaffissorneranut kukkunersiorneqarneranullu aningaasartuutunik matussusiinnaasunik aningaasaateqarfiup aningaasaateqalernissaata iluanaaruteqarnissaatalu tungaanut aningaasaateqarfiup allaffissorneranut aningaasartuutit annikillisinneqarnissaat.

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata atuutinneqalernera pillugu Namminersorlutik Oqartussat nalunaarutaanni nr. 7, 29. januar 2021-meersumi allassimavoq Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaat ulloq 1. januar 2019-imi atuutilersimasoq, taamaattumillu inatsimmi § 1 naapertorlugu aatsitassarsiornermi aningaasaateqarfimmik pilersitsisoqarsimalluni.

Aningaasaateqarfiup imminut aquttup ingerlanneqarneranut, allaffissorneranut kukkunersiorneranullu aningaasartuutissat, aningaasaateqarfimmi isertitassatut naatsorsuutigineqartunit matussuserneqarsinnaanngitsutut nalilerneqarput. Aningaasartuutissat aningaasaateqarfiup aningaasaatimi iluanaarutinit ukiuni arlalinni amerlanerusussatut nalilerneqarput.

Taamaattumik aningaasartuutit iluanaarutinit sanilliullutik naammaginatumik amerlassuseqalerlutik aningaasaateqarfiup aningaasaataasa iluanaarutaasalu naammalernissaasa tungaanut aningaasaateqarfiup aqunneqarnera missingersuusiornermi naatsorsuuserinermilu teknikikut aningaasaateqarfittut ilusilerlugu Naalakkersuisunut tunniunneqarallassoq siunnersuutigineqarpoq.

Siunnersuutip nassatarisaanik piffissami aningaasaateqarfiup Naalakkersuisunit aqunneqarfiani Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni aalajangersakkat arlallit atuutissanngillat.

Aqutsineq eqqarsaatigalugu aaqqissuunnerup Sanaartugassanut Iluarsagassanullu Aningaasaateqarfik kiisalu Siunissamut Ungasinnerusumut Aningaasaliissutissanut Aningaasaateqarfik, tamarmik missingersuusiornermi naatsorsuuserinermilu teknikikkut aningaasaateqarfiusut, pingaarnerusutigut assigai. Taakkunaniilli allaanerussut tassaavoq Kalaallit Nunaata Aatsitassarsiornermi Aningaasaateqarfia aningaasaateqarfiummat imminut aquttoq, aningaasallu aningaasaateqarfimmukartut nunatta karsianit avissaarsimatinneqassammata.

Naggasiullugu inatsisissatut siunnersuut tassungalu nassuiaatit innersuussutigissavakka.

Taamatut oqaaseqarlunga siunnersuut Naalakkersuisut sinnerlugit Inatsisartunut oqaluuserisassanngortippara.